

**Razvojno-garantni fond Brčko distrikta BiH aktivno uzeo učešće na V Sajmu obrazovanja i zapošljavanja
Brčko distrikta BiH**

Zavod za zapošljavanje Brčko distrikta BiH u saradnji s Omladinskim centrom “Vermont” i uz podršku Vlade Brčko distrikta BiH organizovali su V Sajam obrazovanja i zapošljavanja, koji je svečao otvorio šef Kabineta gradonačelnika Nedim Hamzabegović.

Na Sajmu je učešće uzelo preko 70 predstavnika privrednog i obrazovnog sektora, nadležnih državnih institucija i organizacija, među kojima i Razvojno-garantni fond Brčko distrikta BiH.

Zajedno s rukovodiocima privrednih i javnih institucija, direktor “RGFBD”-a Milorad Teodorović aktivno je učestvovao na panel diskusiji na temu “Ima li Brčko distrikt BiH odgovore na potrebe tržišta rada” u sklopu koje se razgovoralo o tržištu rada u cilju lakšeg pronalaska posla.

U ime organizatora Sajma, direktorica Zavoda za zapošljavanje Tamara Duvnjak ukazala je na značaj ovakvih i sličnih manifestacija s aspekta traženja posla, ali i promocije zanatskih zanimanja. “Na ovaj način pokušavamo da napravimo određenu vrstu sinergije između tržišta rada i nezaposlenih lica. S obzirom da se svake godine povećava broj učesnika, kako obrazovnih institucija, tako i naših privrednika, ovaj Sajam sve više dobija na značaju u smislu prepoznatljivosti i promocije Brčko distrikta kao lokalne zajednice”, rekla je Duvnjak.

Direktor Razvojno-garantnog fonda Brčko distrikta BiH, Milorad Teodorović je u svom izlaganju skrenuo pažnju na benefite koje pruža “RGFBD” kako za pravna lica i poljoprivredna gazdinstva, tako i za fizička lica.

Kreditne garancije ,kao osnovna djelatnost “RGFBD”-a, su tu kako bi se olakšao pristup kreditnim sredstvima kod komercijalnih banaka. Isto tako putem subvencija kamata pravnim licima i poljoprivrednim gazdinstvima, podržava se razvoj privrede i na indirektan način pospješuje zapošljavanje. Još jedan od novijih programa je subvencije kamata za prvu nekretninu, čime se potpomažu mladi da ostaju u našem gradu, zapošljavaju se i grade porodice. “RGFBD” u saradnji sa ostalim institucijama će i dalje raditi na unapređenju privrede i podršci mladima u Brčko distriktu BiH.

Direktor omladinskog centra “Vermont” Damir Radenković osvrnuo se, između ostalog, na značaj neformalnog obrazovanja tokom karijernog usmjeravanja.

“Škole za prekvalifikaciju i dokvalifikaciju su budućnost, te se ne možemo samo osloniti na formalno obrazovanje. S druge strane, poslodavci nam traže neke vještine koje nezaposlena lica moraju da imaju da bi ih angažovali. Mi radimo s njima na tim vještinama, poput pisanja biografije, motivacionog pisama ili pripreme za razgovor za posao”, istakao je Radenković, te naglasio da je želja organizatora upravo i bila da se na Sajam dovedu svi fakulteti iz BiH s ciljem uspostave saradnje.







